

---

## AZALAÏS DE PORCAIRAGUE.

---

A<sub>R</sub> em al freg temps vengut,  
Qu'el gels, e 'l neus, e la faigna,  
E ill auzelet estan mut,  
C'us de cantar non s'afraigna :  
E son sec li ram pels plais,  
Que flors, ni fuelha no i nais,  
Ni rossignols non i crida  
Que l'an en mai nos reissida.

Tant ai lo cor deseubut,  
Per qu'ieu sui a totz estraigna ;  
E sai que l'om a perdut  
Molt plus tost qu'om non gazaigna.  
E s'ieu faill ab motz verais,  
D'Aurenga me mov l'esglais ;  
Per qu'ieu n'estauc esbaida,  
E'n per solatz en partida.

Domna met mout mal s'amor,  
Que ab trop ric hom plaideia,  
Ab plus aut de vavator ;  
E cil que o fai folleia.  
Que Ovidy o retrai,

Qu'amors per ricor non vai;  
E domna que n'es chausida,  
En tenc per envilanida.

Amic ai de gran valor,  
Que sobre totz seingnoreia;  
E non a cor trichador  
Vas me, que s'amor m'autreia.  
Ieu dic que m'amors l'echai;  
E cel que diz que non fai,  
Dieus li don mal' escarida;  
Qu'ieu m'en teing ben per guarida.

Bels amics de bon talan,  
Son ab vos totz jornz en gatge,  
Corteza e de bel semblan;  
Sol no m demandes outrage,  
Tost en venrem a l'assai,  
Qu'en vostra merce m metrai:  
Vos m'avetz la fe plevida  
Que no m demandes faillida.

A dieu coman Bel Esgar,  
E plus la cieutat d'Aurenza,  
E Gloriet, e 'l Caslar,  
E lo senhor de Proenza,  
E tot quan vol mon ben lai;  
Mas lai on son fait l'assai,

Cellui perdei c'a ma vida,  
E 'n serai totz jornz marrida.

Joglars, que avetz cor gai,  
Ves Narbona portatz lai  
Ma chanson, ab la fenida,  
Lei cui jois e jovens guida.